

欽定四庫全書

子部

普濟方卷一百

二十九
三十



南京中医药大学图书馆版权所有

欽定四庫全書

普濟方卷一百二十九

明周王朱楠撰

傷寒門

辨傷寒熱病兩感證候

夫熱病者皆傷寒之類也或愈或死其死皆以六七日間
其愈皆以一日已上者何也夫巨陽者諸陽之屬也其
脈連於風府故為諸陽主氣人之傷於寒也故病則為
熱雖甚不死其兩感於寒而病者必死夫兩傷於寒病

者一日則巨陽與少陰俱病故頭痛口乾煩滿而渴

手太陽是

小腸之經手少陰是心之經也

二日足陽明與足太陰俱病則復滿體

熱不食譫言

足陽明胃之經足太陰脾之經

三日則足少陽與足厥陰

俱病則耳聾囊縮水漿不入口則不知人六日而死矣

足少陽膽之經足厥陰肝之經也

是為六經陰陽表裏者也陽為腑主

表陰為臟主裏臟腑俱病故曰兩感三日而死者為一

日兩經受故云兩感是表裏俱病故六日而死矣

辨傷寒熱病不可治形候

傷寒三部脈陰陽俱盛大汗出不解者不可治

傷寒陰陽俱熱虛不止者不可治

傷寒脈至乍數乍疎者不可治

傷寒譫語妄語身熱脈浮大手足溫者生脈沉細手足逆冷者不可治

傷寒欬而上氣其脈散者不可治

傷寒熱盛脈浮大者生沉小者不可治

傷寒已得汗脈沉小者生浮大者不可治

傷寒譫語直視而喘者不可治

傷寒下利厥逆躁不能卧者不可治

傷寒發熱下利至厥不反者不可治

傷寒病惡寒踈而利手足逆者不可治

傷寒五六日脈微細沉但欲卧汗出不煩時自吐利復

煩躁不得卧寐者不可治

傷寒六七日喘息高者不可治

傷寒發汗汗出若大瀉發不可治

傷寒洩而腹滿甚者不可治

傷寒目不明熱不已者不可治

傷寒老人嬰兒熱而復滿者不可治

傷寒汗出嘔血者不可治

傷寒舌本爛熱不已者不可治

傷寒欬血而衄汗不出出不至足者不可治

傷寒髓熱者不可治

傷寒熱而瘕者不可治

傷寒熱病腰折瘕瘕齒噤者不可治

傷寒下利後脈絕於手足厥冷脈不還不可治

傷寒四逆惡寒脈不至其人不熱而燥者不可治

熱病脈代者一旦死

熱病二三日身體熱腹痛頭痛俛食飲如故脈直而疾者至八日不可治

熱病三四日腹已下不得汗脈大疾者生脈細小難得者不可治

熱病四五日頭不熱腹不痛而吐脈來微細至十二日不可治

熱病七八日脈微小便如墨口乾脈代舌焦乾黑者不可治

熱病七八日脈微小病人便血口中乾一日半而死

熱病七八日脈不燥不數後三日中有汗三日不汗者死

熱病八九日頭不痛身不痛目不赤色不變而反利脈

來壘壘按不彈手時大心下堅者至十七日不可治

熱病已得汗而脈尚躁盛此陰脈之極也死

熱病脈常躁而不得汗者此陽脈之極也死脈盛躁得汗者生也

熱病已得汗體熱不去者不可治

熱病其人滾滾大熱脈細小者不可治

熱病下利不止腹中痛甚者不可治

辨可灸形證

夫少陰病其人雖裏和其病惡寒者宜灸之

少陰病吐利手足逆而發熱脈不足者灸其少陰

夫吐下手足厥無脈者當其厥陰灸之不溫反微喘者
死

傷寒六七日脈數手足厥煩躁不已灸厥陰不順者死

辨不可灸形證

凡微數之脈不可灸因熱為邪必致煩逆內有損骨傷
筋血枯之患脈當汗解反以灸之邪無所去因火而盛

病當愈重此為逆之治欲解者當發其汗而解也

辨可火形證

夫凡下利後下部中痛當溫之宜炒枳實若熬鹽等熨之

辨病不可火證

夫傷寒寸口脈浮而弱即血氣虛衛氣微其脈浮則汗出如流珠衛氣微榮氣虛其脈浮汗出如油太陽病中風以火劫其汗風被火熱即冷血氣流澀常有潮熱身體枯

發黃病陽勝即衄陰虛即小便難陰陽俱虛竭身體枯
燥但頭汗出至頸而還腹滿微喘口乾咽爛或不大便
其甚者噦手足躁擾循衣摸床若心下滿小便利者其
人可治小便不利不可治

夫傷寒脈浮而以火逼劫汗即亡陽必驚狂卧起不安
夫陽病以火蒸之不得汗者其人必躁結若不結必下
清血其脈躁者必發黃也

夫太陽病而熨其背大汗必出火氣入胃胃中乾燥必

發慌語

辨可水形證

夫太陽病差後胃中乾燥不得眠睡渴欲飲當少與之即愈若嘔吐熱在膈上思水者與五苓散即飲水也

夫傷寒七八日大渴欲食水然當與之常令不足勿意極也

夫凡傷寒病能飲水者為欲愈也若不渴而強與之因此成禍者其數多矣

夫水可除煩使胃和常須少與勿令多若還不與無由
汗強與還因水致痾病非大渴不可與水渴不與水無
由作汗則喘而殂也傷寒水為欲愈之候若渴者與之
過多或小渴而強與之飲腹中熱少一不能消停飲作
害者多矣曰水結曰喘悸曰咳噎曰咳噦曰下利曰小
便不利安有不自水氣得之診視又職此太陽病發汗
後大汗出胃中燥不得眠其人欲水當少與之胃和則
愈厥陰病厥病渴欲飲水者與水則愈霍亂發熱頭痛

身疼熱多飲水者與五苓散嘔吐條水結證見頭汗出
條飲水多停心下氣上乘心則為悸水氣結於胸脇則
為水結胸胃中虛冷則為冷嘔噦冷氣相搏為噎上迫
於肺則為咳喘漬入腹中則為下利邪執所搏畜於下
焦則為小便不利小腹滿而裏急溢於皮膚則為腫重
飲水過多者五苓散導之

辨不可水形證

夫凡發汗後飲水水灌之其人必喘水藥不得入口入

則為逆傷寒結胸為無熱證者宜與平和之藥若以水灌之益令熱不得出當汗而不汗即煩假令汗出後腹中痛可服和氣止痛之藥夫寸口脈浮大醫反下之此為大逆浮則無血大則為寒寒氣相搏即為腹鳴醫不知而反飲其水令汗大出水得寒氣必相搏其病必甚也

夫傷寒五六日而渴欲食未宜與也為腹中熱氣尚少不能消之更作病深矣若大渴者宜與之也

辨可溫形證

夫法冬宜熱藥

夫凡病發熱頭痛脈浮數身有疼痛宜溫其表

夫病腹滿下利嘔吐身疼痛者宜溫其表裏

夫太陽病下利不渴其臟有寒當宜溫之其人飲食入則吐手足寒脈弦遲此為中寒不可吐下也當溫之

夫少陰病其脈沉者急當溫之下利不欲食者當宜溫之下利脈遲緊為痛未止下利脈浮大者此皆為虛宜